

Kiwanis a presenta su buki 'Axel y su Pork'i Spaar'

KIWANIS Club of Young Professionals Aruba (KYPA) a presenta e proyecto educativo di buki 'Axel y su Pork'i Spaar'. E buki aki ta forma parti di un serie di actividad cu KYPA ta eherciendo for di aña 2012 p'asina concientisa y educa muchanan di nos comunidad riba e topico di finansa personal.

Asina aki KYPA ta contribui na crea un comunidad fuerte y conciente pa futuro.

E storia di 'Axel y su Pork'i Spaar' ta un storia cu lo concientisa y educa nos muchanan riba e topico di finansa personal. E meta di e buki ta pa siña nos muchanan entre 8 pa 10 aña con pa genera placa, gasta placa concientemente, inverti placa pa por genera mas y tambe comparti cu esnan cu no tin.

Nos ta convenci cu e balornan aki ta importante pa nos muchanan p'asina den futuro nos tin un comunidad capaz y responsabel.

E buki a wordo scirbi pa Edselyn Figaroa y ilustra pa Leidys Ledesma. E personanan menciona cu nan mente creativo a yuda KYPA desaroya e buki aki. KYPA ta sigur cu e muchanan lo disfruta di 'Axel y su Pork'i Spaar' y tambe cu e lo haci un diferencia serca nos mucha y mayornan pa stimula lesamento.

KYPA conhuntamente cu Fundacion Bon Nochi Drumi Dushi lo ta organisando 4 atardi di storia rond di Aruba. Muchanan cu registra y participa n'e atardinan aki lo haya un buki completamente gratis.



E atardinan di storia lo ta riba 21 di juli na MFA Noord, 28 di juli na MFA Paradera, 4 di augustus na YMCA San Nicolas y 11 di augustus na Biblioteca Nacional na Playa.

Tur atardi di storia lo ta di 5or pa 7or y pa participa mester registra via di e-mail na secretary@kyparuba.org of manda un mensahe na e pagina di Facebook di Kiwanis Club of Young Professionals Aruba.

E proyecto aki ta posibel danki na nos banconan comercial Aruba Bank y Caribbean Mercantile Bank cu desde inicio a sostene e proyecto aki di KYPA. Ambos banco lo ta presente n'e atardinan di storia p'asina informa mayornan con pa habri un cuenta di spaar pa nan muchanan.

KYPA ta invita pueblo henter specialmente nos muchanan pa registra y asisti n'e atardinan di storia y sera conoci cu 'Axel y su Pork'i Spaar'.